

## На Велицей вечерни

аще в субботу вечера, поем Блажен муж, кафисму всю. Аще же в неделю вечера, поем Блажен муж, первый антифон. Аще ли во иной день, Блажен муж, не поем, но по предначинательном псалме поем:

### Господи воззвах на глас 6.

И поем стихиры праздника на 8: глас 6: Подобен: Всю отложивше:

1. Стих: Из глубины воззвах к Тебе, Господи,/ Господи, услыши глас мой.
2. Стих: Да будут уши Твои/ внимлюще гласу моления моего.
3. Стих: Аще беззакония назириши, Господи, Господи, кто постоит;/ яко у Тебе очищение есть.

Крестъ воздвигаем,/ на нем Вознесеннаго страсть пречистую/ пети повелевает твари всей:/ на том бо убив нас убившаго,/ умерщвленныя оживил есть,/ и удобри, и на небесех жити сподоби яко милосерд,/ премножеством благодости./ Тем радуящися, вознесем имя Его, // и Того возвеличим крайнее снисхождение. [Трижды.]

4. Стих: Имене ради Твоего потерпех Тя, Господи, потерпе душа моя в слово Твое,/ упова душа моя на Господа.
5. Стих: От стражи утренния до ночи, от стражи утренния,/ да уповае Израиль на Господа.
6. Стих: Яко у Господа милость и многое у Него избавление:/ и Той избавит Израиля от всех беззаконий его.

Моисей предобрази ты,/ руки простер на высоту,/ и побеждаше Амалика мучителя,/ Кресте честный, верных похвало,/ страдальцев утверждение, апостолов удобрение,/ праведных поборниче, всех преподобных спасителю,/ тем ты воздвизаема зрящи тварь,/ веселится, и торжествует славящи Христа, // тобою разстоящая собравшаго крайнюю благодостию. [Трижды.]

7. Стих: Хвалите господа вси языцы,/ похвалите его вси людие.
8. Стих: Яко утвердися милость Его на нас,/ и истина Господня пребывает во век.

Кресте пречестный,/ егоже обстоят чини ангельстии веселящися,/ днесь воздвигаем,/ Божественным мановением возносиши вся,/ окрадением снеди отгнанныя,/ и в смерть поползшиися./ Темже ты сердца и устнами вернии лобызающе,/ священние почерпаем:/ возносите, вопиюще Христа преблагаго Бога, // и Того поклоняйтесь Божественному подножию. [Дважды.]

## Слава, и ныне, глас 2:

**Приидите** вси языцы,/ благословенному Древу поклонимся,/ имже бысть вечная правда:/ праотца бо Адама прельстивый древом,/ Крестом прельщается,/ и падает низвержен падением странным,/ мучительством одержавый царское здание./ Кровию Божиею яд змиев отмывается,/ и клятва разрушится осуждения праведного,/ неправедным судом Праведнику осуждену бывшу:/ Древом бо подобаше древо исцелити,/ и страстию Безстрастного, яже на Древе,/ разрешити страсти осужденного,/ но слава Христэ Царю,/ еже о нас Твоему мудрому смотрению, // имже спасл еси всех, яко Благ и Человеколюбец.

**Вход. Прокимен дне. [Аще случится праздник сей в субботу: в пяток вечера прокимен дне оставляется, и поется прокимен великий, глас 7: Бог наш на небеси и на земли, вся елика восхоте, сотвори.**

**Понеже в субботу вечера поется прокимен: Господь воцарися: И чтения.**

## На литии стихиры самогласны, глас 1.

**[Андреа Иерусалимского:]** Днесь яко воистинну святовещанный глагол Давидов конец прият:/ се бо яве пречистых ног Твоих поклоняемся подножию,/ и на сень крилу Твоею надеющися,/ Всещедрый, вопиём Ти:/ да знаменуется на нас свет лица Твоего./ Православных людей Твоих рог вознеси/ честнаго Креста Твоего воздвижением, // Христе Многомилостиве.

**Насажденное** в Краниеве месте, Древо сущаго живота, на немже содела спасение Превечный Царь посреде земли, возносимо днесь, освящает мира концы, и обновляется воскресения дом: радуются ангели на небеси, и веселятся человецы на земли, Давидски вопиюще, и глаголюще: вознесите Господа Бога нашего, и поклоняйтесь подножию ногу Его, яко свято есть: подай миру велию милость.

**Прообразуя** Крест Твой Христе, патриарх Иаков, внуком благословение даруя, на главах пременены руки сотвори. Егоже Спасе, мы днесь возносяще зываем: даруй христолюбивым людям победы, яко Константину одоление.

## Глас 2. [Феофаново:]

**Божественное** сокровище в земли скрываемо,/ Жизнодавца Крест на небесех показася царю благочестивому:/ и победы на враги подписание являет разумно./ Егоже радуяся верою и любовью,/ божественно востек к высоте зрения,/ тцанием же того от земных недр изнесет // во избавление мира и спасение душ наших.

**[Киприаново:]**

**Р**ук пременение патриарха Иакова на благословение чад, державное Креста Твоего предъявляше знамение. Егоже мы держаще тверда хранителя, демонския всемошно отгоним полки, и велиарову гордыню в нем низлагаем, враждебнейшаго Амалика побеждаем всегубительную силу. Того и ныне возносима благочестивомудренно, вернии, во очищение грехов, Твоей благодати во многомножайшем гласе, вопиюще приносим: Господи помилуй, из Девы воплотивыйся, ущедри рук Твоих, Блаже, мудрое создание.

**[Льва Деспота:]**

**Т**ы мой покров державен еси, тричастный Кресте Христов: освяти мя силою твоею, да верою и любовью поклоняюсь и славлю тя.

**Глас 4:**

**В**осплещем днесь пѣсенное торжество, / и светлым лицом, и языком ѣсно возопи́м: / нас ради, Христе, суд приѣмый, / и оплевания и раны, и червленицею оде́явыйся, / и на Крѣст възше́д, / Егѡже видевше солнце и луна свет скръ́ша, / и страхом земля колеба́шеся, / и завеса церковная раздрася на дво́е: / Ты́ и ныне даруй Крест Твой честный нам, / блюстителя и хранителя, и прогонителя де́монов, / яко да вси облобызающе, вопи́ем ему: / спаси́ ны, Кресте, силою тво́ею, / освяти ны светлостію твоею, честный Крѣсте, / и укрепи ны воздви́жением тво́им, // яко свет нам дарован еси, и спасение ду́ш наших.

**[Анатолиа:]**

**С**ветосиянен звездами образ предпоказа, Кресте, победу одоления благочестивому царю великому, егоже мати Елена, изобретши, мироявленна сотвори: и ты днесь воздвижуще, верных лица зовем: просвети ны светлостію твоею, Кресте живоносный. Освяти ны крепостію твоею, всечестный Кресте, и утверди ны воздви́жением твоим, воздвигаемый ко ополчению врагов.

**Слава, и ныне, глас тойже: [Анатолиа:]**

**Ч**естнаго Крестá Христе, / действо прообразів Моисей, / победи́ противнаго Амалика в пустыни Сина́йстей: / егда бо простираше руце, Креста образ творя́, / укрепляхуся лю́дие: / ны́не же вещей сбытие в нас испѡлнися. / Днесь Крест воздвизается, и демони бе́гают. / Днесь тварь вся от тли свободи́ся: / вся́ бо Креста ради возсияша нам дарованія. / Темже радующеся вси припадаем Тебе глаголюще: // яко возвеличишася дела твоя, Господи, сла́ва Тебе.

## На стиховне стихиры, глас 5. Самоподобен:

**Р**áдуйся живоносный Кресте,/ благочестия непобедимая побéда,/ двéрь райская, верных утверждéние,/ Цéркве ограждение, имже тля разорися и упразднися,/ и попрося смертная держава,/ и вознесóхомся от земли к небéсным,/ оружие непобедимое, бесов сопротивобóрче:/ слава мучеников,/ преподóбных яко воистинну удобрéние:/ пристанище спасéния,// даруй миру вéлию мýлость.

**Стих:** Возносите Господа Бога нашего,/ и покланяйтесь подножию ногу Его, яко свято есть.

**Р**адуйся, Господень Кресте,/ имже разрешился от клятвы человечество,/ сущия рáдости знамéние,/ прогоняяй враги во твоём воздвижении всечéстне,/ нам помощниче: царей державо,/ крепость праведных, священников благолéпие,/ воображаемый, и лютых избавляяй,/ жезл силы, имже пасемся:/ оружие мира, егоже со страхом обсто́ят áнгели:/ Христа Божественная слава,// подающаго миру велию милость.

**Стих:** Бог же Царь наш прежде века,/ содела спасение посреде земли.

**Р**áдуйся слепых наста́вниче,/ немощных врачу, воскресение всех умёрших,/ воздвигнувший ны во тлю пáдшия,/ Кресте честный: имже разрушился клятва, и процвете нетлéние:/ и земнии обожихомся, и диавол всеконечно низвёржеся./ Днесь воздвизаема ты видяще рука́ми архиерéйскими,/ возно́сим Вознесеннаго посреде Тебе, и Тебе покланя́емся,// почерпающе богато велию мýлость.

### Слава, и ныне, глас 8. Иоанна монаха:

**Е**гоже древле Моисей прообразовав собою,/ Амалика низложив победы:/ и Давид песнопевец,/ подножию Твоему, вопия, кланяться повелеваше,/ честному Кресту Твоему Христе Боже,/ днесь грешнии кланяемся./ Устами недостойными,/ Ты изволившаго пригвоздится на нем,/ воспевающе, молимся:// Господи, с разбойником Царствия Твоего сподоби нас.

**Таже, Ныне отпускаеши:**

### На благословении хлебов, тропарь, глас 1:

**С**паси Гóсподи люди Тво́я,/ и благослови достоя́ние Твоё,/ победы православным христианом на сопротивныя да́руя,// и Твое сохраняя Крестóм Твоим жительство. **[Трижды.] И чтем слово о честнем Древе.**